

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

RJEŠENJE
po zajedničkoj Prijavi namjere koncentracije privrednog subjekta ČEZ a.s., Republika
Češka, i privrednog subjekta MOL Magyar Olaj-és Gázipari Nyilvánosan Működő
Részvénytársaság, Republika Mađarska

Sarajevo
juni 2008. godine



Broj: 01-06-26-015-5-II/08
Sarajevo, 12. juna 2008. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), i rješavajući po zajedničkoj Prijavi namjere koncentracije privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika, i privrednog subjekta MOL Magyar Olaj-és Gázipari Nyilvánosán Működő Részvénytársaság, Október huszonharmadika u.18., 1117 Budimpešta, Republika Mađarska, podnesenu po advokatu Seadu Miljkoviću, Fra Anđela Zvizdovića 1, 71000 Sarajevo, zaprimljenu dana 25. aprila 2008. godine pod brojem: 01-06-26-015-II/08, Konkurencijsko vijeće, na 67. (šezdesetsedmoj) sjednici održanoj dana 12. juna 2008. godine, je donijelo

R J E Š E N J E

1. Ocjenjuje se dopuštenom koncentracija koja ima uticaj na tržište električne energije u Bosni i Hercegovini nastala dugoročnim zajedničkim ulaganjem privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika, i privrednog subjekta MOL Magyar Olaj-és Gázipari Nyilvánosán Működő Részvénytársaság, Október huszonharmadika u.18., 1117 Budimpešta, Republika Mađarska, u privredni subjekt HoldCo, Kraljevina Holandija.
2. Ovo Rješenje o koncentraciji se upisuje u Registar koncentracija.
3. Radi nepodnošenja Prijave namjere koncentracije u zakonom predviđenom roku, privrednom subjektu ČEZ a.s. Prag, Duhová 2/1444, Praha 4, poštanski pretinac 14054, Češka Republika, i privrednom subjektu MOL Magyar Olaj-és Gázipari Nyilvánosán Működő Részvénytársaság, Október huszonharmadika u. 18., Budimpešta, Republika Mađarska, izriče se novčana kazna u visini od 150.000,00 KM, koju su obavezni platiti u vremenskom roku od 8 dana, od dana prijema ovoga Rješenja.
4. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 25. aprila 2008. godine pod brojem: 01-06-26-015-II/08, zajedničku Prijavu namjere koncentracije (u daljem tekstu: Prijava) privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika (u daljem tekstu: ČEZ), i privrednog subjekta MOL Magyar Olaj-és Gázipari Nyilvánosán Működő Részvénytársaság, Október huszonharmadika u. 18., 1117 Budimpešta, Republika Mađarska (u daljem tekstu: MOL) (u daljem tekstu: podnosioci Prijave), podnesenu po opunomoćenom advokatu Sead Miljkoviću (punomoć izdata u Pragu od privrednog subjekta ČEZ dana 26. marta 2008. godine i ponomoć izdata u Budimpešti od privrednog subjekta MOL dana 01. aprila 2008. godine), Fra Anđela Zvizdovića 1, 71000 Sarajevo.

Uvidom u podnesenu Prijavu utvrđeno je da nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriteriji za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće zatražilo dopunu iste (akt broj: 01-06-26-015-1-II/08 dana 05. maja 2008. godine), u skladu s članom 31. istoga Zakona. Podnosioci Prijave u skladu sa zahtjevom Konkurencijskog vijeća su dopunili Prijavu traženom dokumentacijom (podnesak broj: 01-06-26-015-2-II/08 dana 08. maja 2008. godine).

Po prijemu tražene dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu s članom 30. stav (3) Zakona, dana 12. maja 2008. godine broj: 01-06-26-015-3-II/08.

Podnosioci Prijave su naveli, u smislu člana 30. stav (2) Zakona, da su podnijeli zahtjev za ocjenu koncentracije tijelu za konkurenciju Evropske komisije, Komisiji za zaštitu konkurencije Republike Srbije i tijelu za konkurenciju Republike Ukrajine.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Predmetna Prijava nije podnesena pravovremeno, u smislu člana 16. stav (1) Zakona, u vremenskom roku od osam dana od zaključivanja Ugovora o zajedničkom ulaganju učesnika koncentracije, budući da je predmetni Ugovor, kao pravni osnov predmetne koncentracije, potpisan dana 20. decembra 2007. godine, dok je predmetna Prijava podnesena Konkurencijskom vijeću dana 25. aprila 2008. godine sa zakašnjenjem od oko četiri mjeseca.

1. Učesnici predmetne koncentracije

Učesnici predmetne koncentracije su privredni subjekt ČEZ a.s. Prag, Duhová 2/1444, Praha 4, poštanski pretinac 14054, Češka Republika, i privredni subjekt MOL Magyar Olaj-és Gázipari Nyilvánosán Működő Részvénytársaság, Október huszonharmadika u. 18., 1117 Budimpešta, Republika Mađarska.

1.1. Privredni subjekt ČEZ a.s. Prag

Privredni subjekt ČEZ a.s. (dioničarsko društvo) Prag, Duhová 2/1444, Praha 4 poštanski pretinac 14054, Češka Republika, evidentiran je u trgovačkom registru u Mjesnom sudu u Pragu, pod registarskim brojem: 1581 dana 06. maja 1992. godine (identifikacijski porezni broj: 45274649), s osnovnim kapitalom od (..)*¹ KM (..)* CZK).

Vlasnička struktura privrednog subjekta ČEZ, na dan 31. decembra 2007. godine:

Tabela 1.

Rb	Dioničar	Vlasnički udio
1.	Vlada Češke Republike (nadležna institucija)	(..)*%
2.	Ostala pravne osobe	(..)*%
3.	Rukovodioci	(..)*%
4.	Fizičke osobe	(..)*%
	Ukupno	100,00%

Izvor: podaci iz Prijave

¹ (..)* podaci predstavljaju poslovnu tajnu, u smislu članka 38. Zakona o konkurenciji

Osnovne registrovane djelatnosti privrednog subjekta ČEZ su proizvodnja i distribucija električne i toplone energije, trgovina električnom energijom, razvoj električne opreme, projektovanje električnih energetske postrojenja i slično.

ČEZ Grupa predstavlja jednu od najvećih Grupa u energetske sektoru u centralnoj i istočnoj Europi i vlasnik je privrednih društava za proizvodnju električne energije u Republici Poljskoj, Republici Mađarskoj, Republici Slovačkoj, Republici Rumuniji, Republici Bugarskoj, Saveznoj Republici Njemačkoj, itd

ČEZ Grupa, također, je vlasnik i privrednih društava u sektoru telekomunikacija, informacijske tehnologije, projektiranja, inženjeringa, građevinarstva, održavanje elektro-postrojenja i opreme, te iskopavanje ruda i minerala itd.

Privredni subjekt ČEZ pojedinačno ili zajedno ima više od 10,0% udjela u osnovnom kapitalu, odnosno 10,0% prava glasa u privrednom subjektu Nove elektrane Republike Srpske d.o.o. Gacko, Bosna i Hercegovina.

1.1.1. Povezani privredni subjekti ČEZ u Bosni i Hercegovini

Privredni subjekt Nove elektrane Republike Srpske, d.o.o. Gacko, Industrijska bb (u daljem tekstu: NERS) je upisan u sudski registar Osnovnog suda u Trebinju (rješenje broj: 095-0-REG-06-000281), dana 22. decembra 2006. godine, pod registarskim brojem: RU-1-1864-00. Osnovna registrovana djelatnost privrednog subjekta NERS je proizvodnja i prodaja električne energije.

Privredni subjekt ČEZ ima 51,0% udjela u osnovnom kapitalu privrednog subjekta NERS, dok Mješoviti holding Elektroprivreda Republike Srpske (u vlasništvu Vlade Republike Srpske) ima 49,0% udjela.

Privredni subjekt ČEZ u procesu je osnivanja privrednog subjekta u Federaciji Bosne i Hercegovine (ČEZ Bosna i Hercegovina d.o.o. Sarajevo), koji će biti u njegovom 100,0% vlasništvu, i koji će biti registrovan za proizvodnju i prodaju električne energije.

1.2. Privredni subjekt MOL Magyar Olaj-és Gázipari Nyilvánosan Működő Részvénytársaság, Budimpešta

Privredni subjekt MOL Magyar Olaj-és Gázipari Nyilvánosan Működő Részvénytársaság, Október huszonharmadika u.18., 1117 Budimpešta, Republika Mađarska, upisan u nadležnom sudu u Budimpešti, pod matičnim brojem: Cg. 01-10-041683, dana 10. juna 1992. godine, s osnovnim kapitalom (..)* KM (..)* HUF).

Vlasnička struktura privrednog subjekta MOL, na dan 31. decembra 2007. godine:

Tabela 2.

Rb	Naziv dioničara	Broj dionica
1.	Strani institucionalni investitori	(..)*%
2.	OMV – Republika Austrija	(..)*%
3.	BNP Paribas –Republika Francuska	(..)*%
4.	Magnolia Finance Ltd –Velika Britanija	(..)*%
5.	MFB Invest Zrt. – Republika Mađarska	(..)*%
6.	OTP Bank Nyrt –Republika Mađarska	(..)*%
7.	Domaći investitori	(..)*%
8.	ČEZ - Republika Češka	(..)*%
	UKUPNO	100,0%

Izvor: podaci iz Prijave

Osnovne registrovane djelatnosti privrednog subjekta MOL su:

- Istraživanje i proizvodnja sirove nafte, prirodnog plina i proizvoda od plina;
- Proizvodnja naftnih derivata i proizvoda od prirodnog plina, te ostalih plinskih proizvoda;
- Prerada, transport i skladištenje sirove nafte;
- Transport, skladištenje i distribucija proizvoda od nafte;
- Veleprodaja i maloprodaja derivata nafte;
- Upravljanje maloprodajnom mrežom benzinskih postaja;
- Uvoz, transport, skladištenje i trgovina na veliko prirodnog plina i plinskih proizvoda.

Grupa MOL je jedna od najvećih multinacionalnih korporacija u srednjoj Europi i djeluje u Republici Austriji, Republici Sloveniji, Republici Slovačkoj, Republici Rumunjskoj, Republici Hrvatskoj, Bosni i Hercegovini, Republici Srbiji, itd.

Skupinu MOL sačinjava najveće petro-hemijsko privredno društvo TVK Plc-Republika Mađarska (s vlasničkim udjelom od (..)*) i naftna kompanija Slovnaft-Republika Slovačka (s vlasničkim udjelom od (..)*) i privredno društvo za trgovinu na veliko i malo Roth (s vlasničkim udjelom od (..)*) te strateško partnerstvo s naftnom kompanijom INA Industrija nafte Zagreb (s vlasničkim udjelom (..)*)+1 dionica).

Grupa MOL u Bosni i Hercegovini, u 2006. godini, na tržištu motornih goriva, maziva i petro-hemijskih proizvoda ima sljedeće tržišne udjele:

Tabela 3.

	Vrsta proizvoda	Šifra proizvoda	Količina (000 tona)	Tržišni udio
1.	Propan plin	2711190000	(..)*	(..)*%
2.	Benzin goriva	2710114900; 2710114500	(..)*	(..)*%
3.	Dizel gorivo	2710194100	(..)*	(..)*%
4.	Mazut	2710194500	(..)*	(..)*%
5.	Fuel Oil	2710196110	(..)*	(..)*%
6.	Kerozin	2710192110	(..)*	(..)*%
7.	Petrohemijski proizvodi	2707309000; 2710112100; 2710112500 2710199900; 2902200000; 2902300000	(..)*	(..)*%
8.	Bitumen	2713200000	(..)*	(..)*%
	Ukupno	-	(..)*	(..)*%

Izvor: Podaci iz Prijave

Grupa MOL u Bosni i Hercegovini distribuciju svojih proizvoda (Tabela 3.) obavlja direktno preko privrednog subjekta Energopetrol d.d. Sarajevo i preko velikog broja nezavisnih distributera registrovanih u Bosni i Hercegovini.

Prema podacima iz Prijave privredni subjekt MOL pojedinačno ili zajedno ima više od 10,0% udjela u osnovnom kapitalu, odnosno 10,0% ili više prava glasa u privrednom subjektu Energopetrol d.d. Sarajevo.

1.2.1. Povezani privredni subjekti MOL u Bosni i Hercegovini

Privredni subjekt Energoinvest-Energopetrol Sarajevo je osnovan 1960. godine kao dio korporacije Energoinvest-Sarajevo. Preregistracijom je naziv promjenjen u Energopetrol d.d. Sarajevo, Maršala Tita 36, 71000 Sarajevo (u daljem tekstu: Energopetrol), i evidentiran pod matičnim brojem: 1-21070, rješenjem Kantonalnog suda Sarajevo broj: UF/I-60/04 od dana 06. maja 2004. godine, s osnovnim kapitalom od (..)* KM.

Osnovne registrovane djelatnosti privrednog subjekta Energopetrol su spoljna trgovina naftom i naftnim derivatima, trgovina na malo i veliko motornim gorivima, mazivom i sličnim proizvodima.

Vlasnička struktura privrednog subjekta Energopetrol, na dan 31. decembra 2007. godine, je:

Tabela 4.

Dioničari	Iznos (KM)	Broj dionica	Postotak
INA Zagreb	(..)*	(..)*	(..)*%
MOL Budimpešta	(..)*	(..)*	(..)*%
Zajedno konzorcij INA i MOL	(..)*	(..)*	(..)*%
Vlada Federacije BiH	(..)*	(..)*	(..)*%
Ostali dioničari	(..)*	(..)*	(..)*%
Ukupno	(..)*	(..)*	100,00%

Izvor: Podaci iz Prijave; podaci Konkurencijsko vijeće

2. Obaveza prijave namjere predmetne koncentracije

Obaveza prijave namjere koncentracije privrednih subjekata, u smislu odredbe člana 14. stav (1) tačka a) Zakona, postoji ako ukupni godišnji prihodi učesnika koncentracije ostvaren prodajom roba i/ili usluga na svjetskom tržištu, iznose preko 100.000.000,00 KM, po završnom računu u godini koja je prethodila predmetnoj koncentraciji i ako je najmanje jedan od učesnika koncentracije registrovan na teritoriji Bosne i Hercegovine.

Ukupni godišnji prihodi privrednih subjekata učesnika predmetne koncentracije, na dan 31. decembra 2006. godine, iznose:

Tabela 5.

	ČEZ		MOL	
	KM	EUR	KM	EUR
Svijet	(..)*	(..)*	(..)*	(..)*
Bosna i Hercegovina	-	-	(..)*	(..)*

Izvor: Podaci iz Prijave

Ukupni godišnji prihodi privrednih subjekata učesnika predmetne koncentracije (Tabela 5.) na svetskoj nivou iznose preko 100.000.000,00 KM odnosno privredni subjekt ČEZ je ostvario (..)* KM, a privredni subjekt MOL je ostvario (..)* KM, po završnom računu u godini koja je prethodila predmetnoj koncentraciji, dok ukupan prihod privrednih subjekata učesnika koncentracije u Bosni i Hercegovini iznosi (..)* KM.

Godišnji prihod učesnika koncentracije (Tabela 5.) predstavlja ukupan prihod (bez poreza na dodanu vrijednost i drugih poreza koji se direktno odnose na učesnika koncentracije, na svjetskom i na tržištu Bosne i Hercegovine, u smislu člana 8. tačka h) predmetne Odluke.

Budući da su učesnici koncentracije ispunili uslove, u smislu člana 14. stav (1) tačka a) Zakona, koji se tiču zajedničkog ukupnog godišnjeg prihoda (Tabela 5.) i da najmanje jedan privredni subjekt učesnik koncentracije je registrovan na teritoriji Bosne i Hercegovine, učesnici koncentracije su obavezni podnijeti Prijavu.

3. Pravni okvir ocjene predmetne koncentracije

Konkurencijsko vijeće u provođenju postupka ocjene dopuštenosti predmetne koncentracije primjenilo je odredbe Zakona, Odluke o utvrđivanju relevantnog tržišta («Službeni glasnik BiH»,

broj 18/06) te Odluke o načinu podnošenja prijave i kriteriji za ocjenu koncentracija privrednih subjekata.

4. Pravni osnov i oblik predmetne koncentracije

Pravni osnov koncentracije, u smislu člana 30. stav (1) tačka a) Zakona definisan je članom 8. tačka f) alineja 9. Odluke o načinu podnošenja prijave i kriteriji za ocjenu koncentracija privrednih subjekata.

Prema navedenom pravni osnov predmetne koncentracije je Ugovor o zajedničkom ulaganju (u daljem tekstu: Ugovor) potpisan dana 20. decembra 2007. godine u Pragu, Češka Republika od strane ovlaštenih predstavnika privrednog subjekta ČEZ, Dr. Martina Romana, predsjedavajući Upravnog odbora i gospodina Daniela Beneša, dopredsjedavajući Upravnog odbora i predstavnika privrednog subjekta MOL, Mr. Zsolt Hernádi, predsjedavajući Upravnog odbora i gospodina Lajosa Alácsa, izvršnog podpredsjednika MOL Grupe za razvoj strategije i poslovanja.

Predmetni Ugovor se odnosi na zajedničko dugoročno ulaganje podnosioca Prijave koje će se realizovati osnivanjem privrednog subjekta HoldCo, Kraljevina Holandija, koje će kontrolisati dva operativna privredna društva – jedno u Republici Mađarskoj (već osnovano) i drugo u Republici Slovačkoj (treba biti osnovano).

Predmetnim Ugovorom privredni subjekt ČEZ i privredni subjekt MOL imat će po (..)*% vlasničkih udjela u osnovnom kapitalu, jednaka prava glasa u donošenju operativnih odluka u privrednom subjektu HoldCo, Kraljevina Holandija.

Nadalje, predmetnim Ugovorom je definisano da će mađarsko privredno društvo biti u (..)*% vlasništvu privrednog subjekta HoldCo, dok će u slovačkom privrednom društvu privredni subjekt HoldCo imati (..)*% vlasničkih udjela, privredni subjekt ČEZ imat će (..)*%, a privredni subjekt Slovnaft (pod kontrolom privrednog subjekta MOL) imat će (..)*% vlasništva u (Tabela 6.).

Tabela 6.

Dioničari HoldCo Kraljevina Holandija	Dioničari operativnog društva Slovačka Republika	Dioničari operativnog društva Republika Mađarska
ČEZ (..)*%	HoldCo (..)*%	HoldCo (..)*%
MOL (..)*%	ČEZ (..)*%	(..)*%
(..)*%	Slovnaft (privredni subjekat pod kontrolom MOL) (..)*%	(..)*%
UKUPNO 100,0%	Ukupno 100,0%	Ukupno 100,0%

Izvor: podaci iz Prijave

Prema predmetnom Ugovoru zajedničko dugoročno ulaganje usmjereno je na proizvodnju električne energije na plin u Republici Slovačkoj i Republici Mađarskoj (projekti u ukupnoj vrijednosti od (..)*milijarda KM/(..)* milijarda EUR) odnosno na izgradnju kombinovanih plinsko-parnih postrojenja u rafinerijama grupe MOL u rafineriji Slovnaft (Bratislava-Republika Slovačka) i rafineriji u Százhalombatta-Dufi (Republika Mađarska) s ukupnim ugrađenim kapacitetom od (..)* MW, te u projekt modernizacije postojeće termoelektrane u Bratislavi (Republika Slovačka) s ciljem povećanja kapaciteta do (..)* MW. Prema predmetnom Ugovoru predviđeno je da se projekat proširi prema drugim zemljama srednje i jugoistočne Europe - Republiku Hrvatsku i Republiku Sloveniju i šire.

Konkurencijsko vijeće je utvrdilo da pravni oblik predmetne koncentracije predstavlja zajedničko dugoročno ulaganje dva nezavisna privredna subjekta (privredni subjekt ČEZ i privredni subjekt

MOL), koji djeluju kao nezavisan privredni subjekt (privredni subjekt HoldCo), u smislu člana 12. stav (1) tačka c) pod 3) Zakona.

5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne osobine, kvalitet, uobičajnu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište usluga /proizvoda predmetne koncentracije je tržište električne energije.

Relevantno tržište u geografskom smislu predmetne koncentracije je tržište električne energije Bosne i Hercegovine.

Prema navedenom, relevantno tržište predmetne koncentraciji je tržište električne energije u Bosni i Hercegovini.

Prilikom određivanja relevantnog tržišta Konkurencijsko vijeće je uzelo u obzir činjenicu da privredni subjekt ČEZ ima registrovana subsidijarna privredna društva u Bosni i Hercegovini u oblasti proizvodnje električne energije.

Također, u skladu s članom 5. stav (2) Odluke o utvrđivanju relevantnog tržišta u određenim slučajevima relevantno tržište može biti utvrđeno na međunarodnom nivou. Konkurencijsko vijeće analizom kriterija tržišta na kojima pretežno posluju učesnici koncentracije je utvrdilo da u širem geografskom smislu predmetna koncentracija obuhvata tržište električne energije u zemljama srednje i jugoistočne Evrope, u koje spada i tržište električne energije Bosne i Hercegovine.

6. Analiza relevantnog tržišta predmetne koncentracije u Bosni i Hercegovini

Bosna i Hercegovina ima ukupan ugrađeni proizvodni kapacitet od 4.052 MW, od toga hidroelektrane ostvaruju 52,0% (2.095 MW) dok termoelektrane 48,0% (1.957 MW).

Tabela 7.

Hidroelektrane		Termoelektrane	
Naziv hidroelektrane	Ugrađena snaga (MW)	Naziv termoelektrane	Ugrađena snaga (MW)
Trebinje I	180	Tuzla	779
Trebinje I	8	- G1	32
Dubrovnik (BiH+Hr)	210	- G2	32
Čapljina	420	- G3	100
Rama	160	- G4	200
Jablanica	170	- G5	200
Grabovica	117	- G6	215
Salakovac	210	Kakanj	578

Mostar	75	-(G1, G2, G3, G4) 4x32	128
Jajce I	60	- G5	110
Jajce II	30	- G6	110
Bočac	110	- G7	230
Višegrad	315	Gacko	300
Peć-Mlini	30	Ugljevik	300
UKUPNO	2.095	UKUPNO	1.957

Izvor: Državna regulatorna komisija za električnu energiju Bosne i Hercegovine

Prema procjenama Državne regulatorne komisije za električnu energiju Bosne i Hercegovine (u daljem tekstu: DERK) Bosna i Hercegovina u 2006. godini je proizvela 13.749 GWh električne energije, od čega 56,0% proizvedeno je u termoelektranama, 43,0% u hidroelektranama i oko 1,0% u malim elektranama.

Procjena ukupne proizvodnje /potrošnje u Bosni i Hercegovini, u 2006. godini, je :

Tabela 8.

Procjena za 2006. godinu u (GWh)	EP BiH	EP RS	EP HZHB	Brčko Distrikt	BiH
Proizvodnja	6.460,00	5.405,00	1.884,00		13749,00
Proizvodnja u hidroelektranama	1.505,00	2470,00	1884,00		5859,00
Proizvodnja u termoelektranama	4.870,00	2860,00			7.730,00
Proizvodnja u malim i industrijskim elektranama	85,00	75,00			160,00
Potrošnja	4.250,00	3.324,00	3.287,00	270,00	1.1521,00
Distributivna potrošnja	3.830,00	3.054,00	1.065,00	270,00	8.219,00
Veliki kupci	420,00	220,00	2.200,00		2.840,00
Potrošnja rudnika		50,00	22,00		72,00

Izvor: Državna regulatorna komisija za električnu energiju Bosne i Hercegovine

Prema podacima DERK-a na tržištu proizvodnje električne energije u 2006. godini u Bosni i Hercegovini najveći tržišni udio ima privredni subjekt Elektroprivreda Bosne i Hercegovine (EP BiH) sa 47,0%, privredni subjekt Elektroprivreda Republike Srpske (EP RS) sa 39,3% te privredni subjekt Elektroprivreda Hrvatske zajednice Herceg Bosne (EP ZHB) sa 13,7% tržišnog udjela.

7. Ocjena predmetne koncentracije

Predmetna koncentracija je ex-teritorijalna budući da privredni subjekt ČEZ i privredni subjekt MOL djeluju na svjetskom nivou te ista može imati uticaj na tržištu Bosne i Hercegovine neposredno preko djelovanja njihovih registrovanih subsidijarnih privrednih subjekata, odnosno posredno prodajom /kupovinom proizvoda /usluga učesnika predmetne koncentracije.

Konkurencijsko vijeće analizom relevantnih podataka je ocijenilo da provođenjem namjeravane koncentracije neće doći do promjene tržišnih udjela na relevantnom tržištu u Bosni i Hercegovini te je utvrdilo da predmetna koncentracija neće sprječavati, ograničavati ili narušavati tržišnu konkurenciju na relevantnom tržištu.

Dugoročno zajedničko ulaganje privrednog subjekta MOL i privrednog subjekta ČEZ omogućit će jačanje saradnje u sektoru proizvodnje i prenosa električne energije zemalja srednje i jugoistočne Evrope.

Prema navedenom Konkurencijsko vijeće je ocijenilo dopuštenom predmetnu koncentraciju, u smislu člana 18. stav (2) tačka a) Zakona.

8. Novčana kazna

Prema članu 16. stav (1) Zakona obaveza podnošenja prijave namjere koncentracije je u vremenskom roku od 8 dana od dana zaključivanja sporazuma /ugovora.

Konkurencijsko vijeće je utvrdilo da predmetna Prijava je podnesena dana 25. aprila 2008. godine sa zakašnjenjem od četiri mjeseca. Učesnici koncentracije su bili dužni podnijeti predmetnu Prijavu najkasnije dana 28. decembra 2007. godine odnosno osam dana od dana zaključivanja Ugovor o zajedničkom ulaganju, kao pravnog osnova predmetne koncentracije, potpisanog dana 20. decembra 2007. godine u Pragu, Češka Republika.

Odredbom člana 49. stav (1) tačka b) Zakona, Konkurencijsko vijeće može privrednom subjektu izreći novčanu kaznu do 1,0% ukupnog prihoda ako ne podnese prijavu namjere koncentracije, u smislu člana 16. stav (1) Zakona.

Prema navedenom Konkurencijsko vijeće podnosiocima Prijave izreklo je novčanu kaznu od 150.000,00 KM, u skladu s članom 49. stav (1) tačka b) Zakona a u vezi utvrđenog kršenja člana 16. stav (1) Zakona.

Također, Konkurencijsko vijeće pri utvrđivanju visine novčane kazne imalo je u vidu i činjenicu da podnosioci Prijave djeluju u zemljama u kojima je razvijena konkurencijska praksa i da se radi o velikim kompanijama koje djeluju u velikom broju zemalja Evrope te su radi toga podnosioci Prijave trebali biti upoznati s propisima zemlje u kojoj imaju povezane gospodarske subjekte, preko kojih predmetna koncentracija ima uticaj na tržište u Bosni i Hercegovini.

9. Administrativna taksa

Podnosioci Prijave na ovo Rješenje, u skladu s članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) su dužni platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ibrica Lakišić